

Pengumpul barang lusuh dipenjara seminggu, mengaku miliki kipas dinding secara tidak sah

MIRI: Seorang pengumpul barangan lusuh dijatuhi hukuman penjara seminggu oleh Mahkamah Majistret semalam setelah mengaku bersalah atas tuduhan memiliki sebuah kipas dinding secara tidak sah.

Hukuman itu dijatuhkan Majistret Sandy Yvette Freddy setelah tertuduh, Muhammad Eric Nawan Abdullah mengaku bersalah atas tuduhan yang dibacakan terhadapnya mengikut Seksyen

37 (1) Ordinan Kesalahan-Kesalahan Kecil Sarawak (Bab 56) 1958.

Mengikut kesalahan ini, tertuduh boleh didenda RM500 dan penjara tiga bulan, jika sabit kesalahan.

Menurut keterangan kes, tertuduh didapati ada memiliki sebuah kipas dinding yang diperolehi secara tidak sah.

Eric, 32, dari Kampung Bersatu Batu 8 1/2, Jalan Miri-Bintulu didakwa melakukan kesalahan itu

pada jam 1.30 petang, 26 November lalu di tepi Jalan Acacia 3A di sini.

Ketika rayuan, tertuduh memberitahu bahawa dia tidak mengetahui bahawa kipas itu adalah barang curi kerana dia mengambilnya di tempat membuang sampah yang terletak di luar sebuah rumah.

Pendakwaan kes dilakukan ASP Mary Ong, manakala tertuduh tidak diwakili peguam bela.